



Trais Martins ed ina Martina: Il secretari da la Lia Martin Gabriel, il president da la grupp parlamentara Martin Candinas, l'editura da la «Posta Ladina» Martina Flurina Gammeter e Martin Cabalzar, il schefredactor da La Quotidiana.

FOTOS C. CADRUVI



Tge han els dus endament? Il chauredactor da La Quotidiana Martin Cabalzar en discurs cun cusseglier naziunal Heinz Brand che timuna era la pps grischuna.

In dultsch invit ed ina sairada cun politica e medias

Editurs ed exponents rumantschs s'inscuntran cun parlamentararis federals

■ (anr/vi) Caramels en in scarnuz grischun han ils parlamentararis chattà la mesemna a bun'ura sin lur pults en il cussegl naziunal ed en il cussegl dals chantuns. Cun quest dultsch regalin ha la Lia Rumantscha envidà da star da cumpagnia suenter las debattas. Perfin il nov cusseglier Ignazio Cassis ha preni pedà da vegnir in mumentin a questa tschintgavla sairada rumantscha. Ed er il pli aut Svizzer Dominique de Buman e la presidenta dal cussegl dals chantuns Karin Keller-Sutter han dà suatientscha a l'invit. Cun surdar la clav che simbolisescha la quarta lingua ha il secretari da la Lia Rumantscha Martin Gabriel beneventà ils trais auts politichers.

Who is who da la pressa rumantscha

Sco gia l'onn passà han ins puspè mess las medias rumantschas en il center. Sper la prominenz da radio e televisiun èn questa giada era cumparids ils protagonistas da la pressa. Hanspeter e Silvio Lebrument ch'edeschan La Quotidiana e Martina Flurina Gammeter ch'edescha la «Posta Ladina» han profità da la cha-

schun da discurre cun parlamentararis. Cun il schefredactor Martin Cabalzar e la manadra editoriala Myrta Fasser èn er ils praticchers da las gasettas rumantschas sa mussads en chasa federala.

Empernaivel e divertaivel

«Igl è stà ina flotta occurrenza», di Martin Candinas, president da la grupp parlamentara rumantscha. «La sairada rumantscha vegn schazegiada en chasa federala.» Suenter in di da lungas debattas na fetschian ins sa chapescha betg pli gronds plets uffizials. Impurtant saja ch'ils Rumantschs possian inscuntrar politichers e politicras en in atmosfera lucca. En discurs bilaterals possian ins far palais in u l'auter giavisch u far attent a las sfidas cun las qualas la Rumantschia è confrontada. I saja er ina pussaivladad da tgirar il contact cun l'administraziun, per exempel cun Isabelle Chassot, la directura da l'uffizi da cultura, che vegn regularmain a las sairadas.

Gia passa tschient parlamentararis han part da la grupp rumantscha, di Candinas. Questa rait da contact saja nizzaivla sch'ins haja in giavisch concret.



Ils pli auts politichers han survegni la clav rumantscha: Ignazio Cassis, Martin Gabriel, Martin Candinas, Karin Keller-Sutter e Dominique de Buman (da sanestra).



Dus magnats da paisa: Cussegljer naziunal Jakob Büchler (pcd/SG) e l'editur da Samedia Hanspeter Lebrument.



Eva Riedi planisescha en incumbenza da la Lia l'avignir da la pressa rumantscha. Il schefredactor da la SDA Bernard Maissen po forsa dar buns tips.



Cédric Burgener da Glion (dretg) ha visità la chasa federala e cusseglier naziunal Martin Candinas. Andy Hartmann (amez) da la «Südschweiz» ha adempli al mat quest giavisch.



Il politolog rumantsch Clau Dermont da la Pro Svizra Rumantscha e Silvio Lebrument da la giunta da Samedia.



Medias e politica – il pledader da la SRG Simon Denoth, il president dal cussegl naziunal Dominique de Buman, il president da la SSR Oscar Knapp e la cussegliera naziunala Magdalena Martullo.